

## Parolini e Marti-Müller en scola

Il Plan d'instrucziun 21 cumpeglia era in modul da medias. En quel emprendan tuts scalems dalla scoletta entochen la secundara/reala da sefatschentar dallas pusseivladads che quellas porschan. Per saver con bein che quei rom vegni instruius ha il cau dil departament d'educaziun, cultura ed ambient, cusseglier guvernativ *Jon Domenic Parolini*, visitau il gliendisdis la scola populara a Mustér. Ensemen culla menadra digl Uffeci dalla scola populara, *Chantal Marti-Müller*, ha el assistiu a pliras lecziuns. «Jeu hai survegniu ina bun'impressiun dalla lavur che la scola populara da Mustér presta», puntuescha il minister da scola. Sin damonda dalla FMR ha el era priu cuortamein posiziun davart la scolarisaziun dils affons fugitivs dall'Ucraina. L'integraziun da quels ella scola populara seigi ina sfida ed in'incumbensa rullonta dil proxim temps. (fmr/hh)

## Mirau sur la schuiala dils scolars

Capir e luvrar cun medias ei ina part dall'instrucziun ella scola populara. Co quei funcziuna 1:1 ha il minister da scola dil cantun Grischun, Jon Domenic Parolini, vuliu saver ier a Mustér. Communablamein culla menadra digl Uffeci dalla scola populara, Chantal Marti-Müller, ha el mirau als scolarets e scolars sur la schuiala.

HANS HUONDER/FMR

«Jeu hai survegniu ina bun'impressiun dall'instrucziun da medias ella scola populara a Mustér. Tenor miu manegiar funcziuna quei fetg bein», ha cusseglier guvernativ *Jon Domenic Parolini* detg enviars la FMR suenter sia viseta. El ha saviu seperschuader che medias ei in tema gia en scoletta e ch'il scalem primar lavura lu gia en ina fuorma ordvart creativa cullas pusseivladads tecnicas che stattan a disposiziun. In ulteriur pass pli anavon ein las scolaras ed ils scolars dil scalem superiur. Instrucziun da medias vul dir capir las apparaturas e las pusseivladads che quellas porschan. Mo lu era las specias da medias naven dallas tradiziunals entochen allas digitalas, sco era las schanzas ed ils prighels che quellas ensiaran.

### Ina part dil mintgadi

«Ins senta che las pusseivladads da diever dallas medias s'audan gia tiel mintgadi», constate-

scha il cau dil departament d'educziun, cultura ed ambient. Pli baul era ina stanza d'informatica il liug per quell'instrucziun, oz ein medias sco tablets ni era laptops per gronda part integradas en mintga stanza da scola. «Ei dat secapescha aunc adina differenzas denter las scolars, pia talas ch'eiin gia fetg lunsch cun quell'instrucziun ed autras meins», di *Chantal Marti-Müller*. Igl uffeci porschi denton il sustegn necessari. «Enteifer las scolars dependa ei secapescha era dalla prontadad dil meinascola, dils magisters e dil cussegl da scola con



Duront ina lecziun da medias ella 5avla classa primara a Mustér. Da sen. il scolast Gion Tenner, il president dil cussegl da scola Simon Bergamin, igl inspectur Vigeli Jacomet, Chantal Marti-Müller e cusseglier guvernativ Jon Domenic Parolini.

FOTO HANS HUONDER

bein ch'in tal modul dil Plan d'instrucziun 21 vegn realisau. A Mustér ei quei reussiu bein», puntuescha Parolini.

### Biars affons fugitivs

Sin damonda dalla FMR han ils dus exponents dalla scola populara dil Grischun era priu cuortamein posiziun pertuccont entginas damondas en connex culla scolarisaziun dils affons ucrains ch'arivan sco fugitivs el cantun Grischun. «Igl ei en quei senn ina planisaziun rullonta. Mintga di arivan ulteriurs. Ei drova

ina buna coordinaziun e cooperaziun digl uffeci d'emigraziun cun quel da scola e sport», accentuescha Jon Domenic Parolini. «Ina buoba va gia a scola tier nus, ulteriurs vegnan a suandar il proxim temps. Il mument ein rodund 40 affons dall'Ucraina a Mustér ed integrar quels en in menaschi cun rodund 200 scolars ei buca sempel. Nus sentin denton il sustegn dil cantun», accentuescha il meinascola *Roger Tuor*. Davart igl uffeci da scola ei il cantun engaschus en quella damonda denter auter culs inspecturs da scola.